

# Den cuadro di celebracion di “Mes de la Patria” **Consulado Dominicano na Aruba a anuncia cu lo construi un busto na honor di Juan Pablo Duarte**

Esaki lo bin riba e plechi na cruzada di Caya  
ing. Roland H. Lacle y Leeuwenhoekstraat

Consulado General di República Dominicana na Aruba ta cuminsa dia 25 awor cu construccion di e pedestal pa un busto na honor di Juan Pablo Duarte Diez. Esaki ta den cuadro tambe di celebracion di 168 aniversario di proclamación di independencia nacional di Santo Domingo, cu a tuma lugar 27 de februari na 1844. E actividad aki ta encabeza p’e Cónsul General na Aruba, sra. Joseline Rosario de Rosa, kende hunto cu ingeniero Luis Sifres, Director di Oficina di Ingeniero y Supervisor di Obran di Estado (OISOE).

E ceremonia aki ta conta cu asistencia personahenan importante di Gobierno di Aruba, e.o. Prome Minister Mike Eman y tambe lo ta presente, Gobernador Freddy Refunjol.

E ceremonia ta stipula pa tuma lugar diasabra dia 25 awor pa 11 or di mainta, n’e sitio menciona.

E sitio aki, unda e busto di Juan Pablo Duarte lo bin, lo keda bautisa como Plaza Padres de la Patria, Juan Pablo Duarte, fundador di nación Dominicano.

Cónsul General sra. Rosario de Rosa, lo hiba un discurso n’e ocasion aki, unda lo resalta e balornan patrio di pueblo Dominicano. Awe pueblo Dominicano

ta disfruta di su libertad, danki n’e lucha di homber y muhernan encabeza pa Padres de la Patria, Juan Pablo Duarte Diez, Matías Ramón Mella y Francisco del Rosario Sánchez.

Riba mesun dia, pa 7 or di anochi, Consulado General Dominicano lo auspicia un presentación folklórico y artístico na Plaza Paseo Herencia. Y asina lo cuminsa cu conmemoracion di dia di independencia di Santo Domingo, y ta spera e colonia Dominicano duna acto di presencia n’e actividadnan aki.

